



PARTIDO UNIDADE NACIONAL

7 Setembru 2009

KOMUNIKADU BA IMPRENSA - BANKADA PARLAMENTAR PUN AMIZADE BA DOK DEMAIS LIU ONA

Iha loron 30 Agostu 2009, ex-lider milisia Laksaur vila Suai Maternus Bere, hetan liberdade husi prizaun preventiva tan ba ordem husi Primeiro-Ministro, liu husi Ministra Justisa. Ema fiar katak libertasaun ida né'e tan ba pressaun husi governo indonésiu ba lideransa timorense. Nudar komandante milisia Suai ida, Maternus Bere responsável ba sentensas kona ba mate, tortura, violasaun seksual no deslokamentu forsado povu barak iha 1999. Aktu intervensaun iha sistema judicial timorense ida né'e viola Konstituisaun timorense, kódigu prosesu penal timorense, no iha kodigu penal timorense ida foun nia ókos, aktu né'e krime ida. Libertação Maternus Bere nian né'e ezemplu "amizade ida nebé ba dok demais liu ona". Ita nia governo disposto atu la'o halé'u lei timorense no halo injustisa bot ida ba vitimas violensia tinan 1999 nian, atu serbi ba interesses politikus ita nia nasaun vizinha Indonésia. Povu timorense luta ba independênsia atu moris iha nasaun ida nebé aplika lei ho transparasia no igualdade ba ema hotu-hotu, la hateke ba opiniaun politika. Governu nia asaun hirak né'e hatudu katak nasaun la'o ba kotuk iha dalan luta timor oan sira nian atu estabelese pais independente ida nudar estadu de direitu.

Iha 2003, eskritoriu Prokurador Geral nian akuza Maternus Bere hamutuk ho membru milisia ema nain 13 seluk kona ba krimes contra humanidade liu husi assassinatus, exterminasaun, ema lakon forsadu, tortura, aktus desumanus, violasaun seksual, deportasaun, no persegisaun. Akuzasaun ida né'e ordem atu kaer Maternus Bere. To'o oras n'e'e la bele lori Maternus Bere no membrus milisia sira seluk ba justisa tan ba maioria sira kontinua livre iha Indonesia.

Iha prinsipiis fulan Agostu Maternus Bere fila mai Timor Leste husi Timor Osidental, iha nebé nia servisu hanesan funsionariu públiku indonésiu. Polisia kaer nia tuir akuzasaun nebé Prokurador Geral timor nian hasai, no tribunal distrital Suai ordena katak Maternus Bere tama iha detensaun pré-julgamentu. Tuir kódigu penal timorense, únika pessoa nebé iha kbit atu ordena katak ema suspeitu ida tama iha detensaun pre-julgamentu ka sai husi kadeia, mak juiz.

Iha loron hirak liu ba, Maternus Bere hetan libertasaun husi kadeia tan ordem verbal mai husi Ministra da Justiça, tan Primeiro-Ministro haruka. Né'e kontra lei kriminal timorense. Ema ida só bele sai husi detensaun pr&julgamentu nian tan ordem juiz ida nian, no iha sirkunstansia balun de'it.

Artigo 69 husi Konstituisaun Timor-Leste preconiza katak órgaun soberania sira sei respeita separasaun de poderes. Em prática, né'e signífika katak nem governo, nem parlamento nem presidente bele interfere iha administrasaun justisa liu husi tribunal sira. Artigu 7 no 8 husi kódigu prosedimento kriminal timorense hateten klaramente katak tribunal sira hakrúuk lós dé'it ba Lei nia ukun, no autoridades publikas sira, inklusive governu, iha obrigasaun atu koopera ho tribunais sira iha administrasaun justisa kriminal.

Wainhira obriga libertasaun Maternus Bere nian husi prizaun, governo la kumpri ona nia obrigasaun sira, mai bé, kontrariu fali, interfere iha administrasaun justisa. Tuir Kódigu penal timorense foun, artigo 245 (1), "sé, liu husi meius ilegais, liberta ka, liu husi meu nebé de'it, tulun hasai husi kadeia ema nebé legalmente lakon liberdade", komete krime ida, no "hetan punisaun prizaun tinan 2 tó'o tinan 6". Ida né'e mak efektivamente Primeiru-Ministru ho Ministra da Justisa halo wainhira fasilita Bere nia libertasaun.

Artigo 160 husi Konstituisaun estipula mós katak krimes internacionais nudar krimes kontra humanidade hanesan genosidiu no krimes de guerra, nebé akontese entre 25 Abril 1974 no 31 Dezembru 1999 bele hetan prosedimentu kriminal iha tribunal nasional ka internacional. Wainhira liberta Maternus Bere, governu timorense prevene atu suspeitadu perpetrador krimes kontra humanidade ida atu sei la bele tan hasoru justisa.

Né'e amizade ida nebé ba dók demais liu ona. Maski ita tenki haré reconsiliaun ho Indonésia hanesan prioridade nasional ida, ita hakarak tebes atu fila buat hotu ulun tun ain sae, ita nia soberania, ita nia estadu de direitu, ita nia sistema legal, dignidade vitimas timor oan sira nian, atu ita sai belun ho Indonesia? Se ita amigu tebes duni, Indonésia sei respeita lei timorense no sei permite ba tribunal sira iha Timor atu processa Maternus Bere no sira seluk nebé komete krimes bot iha Timor Leste, tuir lei timorense.

Ami kondena Governu nia asaun ida né'e, no ezige atu Maternus Bere no suspeitu krimes serius sira seluk nebé hetan libertasaun ilegalmente, fila ba detensaun pré-julgamentu nia laran.

/s/

Fernanda Borges

Deputada ba Parlamento Nacional no Prezidente Bankada Parlamentar PUN